

Kadar keciciran pelajar sekolah, ITE berkurangan

► ADLI YASHIR KUCHIT
adli@sph.com.sg

KADAR keciciran pelajar sekolah dan Institut Pendidikan Teknikal (ITE) yang berkurangan sejak beberapa tahun lalu menunjukkan gabungan usaha-rak pemerintah, sekolah dan masyarakat membuahkan hasil.

Pencapaian itu berita baik bagi masyarakat namun beberapa pemimpin Melayu/Islam berpendapat lebih banyak usaha perlu dilaksanakan bagi memastikan kadar keciciran terus dikurangkan.

Di sidang Parlimen Isnin lalu, Setiausaha Parlimen Kanan (Tenaga Manusia merangkap Pendidikan), Encik Hawazi Daipi, mendedahkan peratusan kohort darjah satu yang tidak tamat sekolah menengah berkurangan daripada 4 peratus pada 2000 kepada kurang 1 peratus sepanjang lima tahun lalu.

Selain itu, kurang seperlima daripada kohort yang melanjutkan pengajian di ITE gagal menamatkannya.

Mengulas tentang trend itu, Anggota Parlimen (AP) GRC Chua Chu Kang, Encik Zaqy Mohamad, berkata ia pencapaian menggalakkan namun usaha menangannya "belum tamat".

"Kita perlu terus dekati ibu bapa, cuba huraikan masalah sosio ekonomi masyarakat kerana dalam kalangan pelajar tercicir ramai datang daripada keluarga pincang," katanya.

Dalam hal ini, beliau mengharapkan anggota masyarakat yang berjaya, seperti karyawan profesional, pengurus, eksekutif dan teknisyen (PMET), meluangkan masa membantu pelajar dan ke-



DR FATIMAH LATEEF: Beri penekanan pendidikan kepada penduduk.

uarga pincang.

AP GRC Ang Mo Kio, Dr Intan Azura Mokhtar, memerhatikan pemerintah mempergiat usaha dengan kerjasama badan-badan bantu diri untuk mencapai potensi setiap pelajar.

"Selain memastikan pelajar kita kekal di sekolah, kita perlu memastikan mereka ada peluang pekerjaan baik serta kemahiran hidup sesuai.

"Semua ini usaha berterusan yang memakan masa, namun kita sudah mula lihat hasilnya," kata Dr Intan.

Bagi Profesor Madya Dr Fatimah Lateef, beliau akan terus menekankan peri penting pendidikan apabila bertemu penduduk di kawasan undinya.

AP GRC Marine Parade itu juga sedia menganjurkan sesi motivasi dan medadid pelajar dengan pembimbing.

Sementara itu, beberapa pemimpin badan Melayu/Islam yang dihubungi melahirkan kesediaan mempertingkatkan usaha menangani isu keciciran pelajar.



ENCIK ZAQY: Usaha tangani isu "belum tamat".

Presiden Persatuan Persuratan Pemuda Pemudi Melayu (4PM), Encik Izuddin Taherally, berkata pihaknya memberi tumpuan pada program memperkasa pelajar ITE.

4PM, misalnya, mengendalikan Projek Bestari ITE (bITE) yang disasarkan pada semua pelajar ITE, daripada pelajar cemerlang hingga pelajar lemah.

"Berita tentang kadar keciciran pelajar yang berkurangan amat mengembirakan, tetapi masih banyak perlu kita lakukan bagi mengurangkan lagi kadar tersebut.

"4PM sedia mempertingkatkan keupayaan dalam program serta kakitangannya untuk mendekati lebih ramai pelajar ITE, khususnya mereka yang berisiko tinggi dan menghadapi masalah pendidikan, sosial, keluarga ataupun ekonomi," kata Encik Izuddin.

Pengarah Jabatan Pembangunan Masyarakat Mendaki, Encik Sazali Wahid, memerhatikan: "Pelajar yang



DR INTAN AZURA: Perlu pastikan pelajar peluang pekerjaan baik.

mengikuti program pencegahan ini menunjukkan perubahan sikap terutama sekali dalam menangani cabaran hidup.

"Dengan sokongan yang diberikan rakan-rakan sepejuangan mereka serta dorongan para mentor, pelajar-pelajar ini kekal di sekolah bagi meneruskan pendidikan mereka."

Pengarah Eksekutif AMP, Encik Anuar Yusop, berkata kejayaan masyarakat dalam menangani masalah keciciran akan mencorak masa depan lebih cerah.

"Masyarakat Melayu mempunyai peratusan belia yang lebih besar berbanding masyarakat lain. Cabaran kita lebih besar namun peluang kita juga lebih luas.

"Oleh itu, kita perlu mendekati golongan belia, membimbing dan mendidik mereka agar mereka menjadi aset masyarakat pada masa depan," katanya.